

【教育部新聞稿】(閩南語音檔)

連結 bàng-gà 產業 和齊推揀本土語言——看 bàng-gà 學閩南語上時行

發布日期：109 年 7 月 19 日

發稿單位：終身教育司

承辦人：陳怡寧

電話/手機：02-77366810/0970-996228

E-mail：iling@mail.moe.gov.tw

新聞聯絡人：殷家婷科長

電話/手機：02-77366801/0936-617216

想欲學閩南語的民眾緊照過來，這馬看 bàng-gà 嘛通學閩南語喔！除去逐家上愛的「櫻桃丸仔」，連「少年阿貝 GO！GO！烏麻仔」、「卡滋幫」猶閣有「九藏喵窩」，嘛攏咧講閩南語矣喔！

教育部為著欲予民眾會當用趣味閣有局的方式來學本土語言，特別俗文化部相恰，委託國立臺中教育大學製作幾若齣用閩南語配音的 bàng-gà 好戲齣，予民眾會當佇厝裡就通那看那學，抑是爸母恰囡仔做伙學。好戲繼連台，會興(hìng)著緊來。今年歇熱上時行的，就是看 bàng-gà 學閩南語，逐齣都攏心適代。

這擺咱做的 bàng-gà 齣有：「櫻桃丸仔」(14 集)、「少年阿貝 GO！GO！烏麻仔」(22 集)、「卡滋幫」(34 集)恰「九藏喵窩」(42 集)。前兩齣是通人都呵啉的日本 bàng-gà，後兩齣是咱臺灣人家已做的，向望推揀咱的本土語言，也通助贊咱本土的 bàng-gà 產業。這步一空掠雙隻，的確有應效。特別是「九藏喵窩」這齣，就按呢對臺灣衝(tshìng)到日本去，是咱臺灣頭一部反攻入去日本市場的 bàng-gà，臺灣 bàng-gà 的反擊，正正就是欲行「國際化」著先「本土化」上好的干證。

遮的 bàng-gà 故事主題，濟濟攏是恰咱的日常生活相倚傍的，真適合國中恰國校仔的學生囡仔來學，故事內容嘛是咱濟濟人囡仔時代的共同記持，看著予人真誠感動。

教育部製作的 DVD 現此時已經配送到全國公立國中、國校仔，閣有直轄市政府、縣(市)政府教育局(處)囉，通成做咱推揀閩南語上好的學習資源。

民眾若有想欲看遮的 bâng-gà，嘛會使上網搜揣「教育部閩南語動畫網」
(<https://twbanga.moe.edu.tw>) 就通看著矣。設使若有啥物問題嘛通敲電話予承
辦單位：國立臺中教育大學，服務電話：(04)2218-3915；服務信箱：
bangatw@gmail.com。